

摘藻堂四庫全書薈要

經部

欽定四庫全書薈要

經部

日講易經解義卷十七

詳校官祭酒臣韋謙恒



欽定四庫全書薈要卷四百五十三

經部

日講易經解義卷十七

繫辭下傳

八卦成列象在其中矣因而重之爻在其中矣剛柔相推變在其中矣繫辭焉而命之動在其中矣吉凶悔吝者生乎動者也剛柔者立本者也變通者趣時者也

此一章言卦爻吉凶原於易簡而此四節則先論象爻變動之所自出以推吉凶之所由生也八卦謂乾

兌離震巽坎艮坤三畫之卦象謂奇偶純雜之象因重謂每一衍八重之為六十四也剛柔謂奇偶變謂陰陽變化動謂占者所值當動之爻象孔子意曰易理盡於吉凶吉凶寓於象爻變動象爻變動何自而生乎聖人作易本大極而生兩儀由兩儀而生四象八卦次第成列則乾坤列而純陰純陽之象以著六子列而雜陰雜陽之象以昭象不在成列之中乎由是因已成之卦各以八卦次第加之則內外備而貞

悔全遠近貴賤承乘比應之爻即燦然於各卦之中
矣由是爻之奇偶即為剛柔而六十四卦三百八十
四爻不過剛柔二畫往來推換則凡陰極變陽陽極
變陰不即在此相推中乎由是卦爻之中時有消息
位有當否聖人皆繫之辭而明示以趨避之宜此時
雖未形於動而占者所值當動之爻象豈能出辭所
命之中哉夫辭之所命者吉凶悔吝而已吉凶悔吝
雖已備於繫辭之時必俟卦爻之動而吉凶悔吝方

始昭然是吉凶悔吝固生乎卦爻之動者也使不先繫辭以命之人將何所適從乎然所謂動者亦因乎時而已蓋六十四卦不外剛柔兩畫方其未動一剛一柔各有定位確不可移則剛柔非立易之本者乎然位有定而時無定及其既動則化裁推行總非自主非順乎時之自然而趨乎時之不得不然者乎可見時之所在動不能違人能變通趨時自然動與吉會何凶悔吝之有按天道不外一時聖人合德天地

之學亦不外於一時孔子釋乾五曰先天而天弗違
後天而奉天時釋大有彖辭曰其德剛健而文明應
乎天而時行萃之時用大牲吉也而損之時則二簋
可用享屯之時君子以經綸也而需之時則宜飲食
宴樂蓋莫非時之所宜然也知易之理不外乎一時
則知聖人體易之學矣

吉凶者貞勝者也天地之道貞觀者也日月之道貞明
者也天下之動貞夫一者也

此二節是申明吉凶之故而示人以貞一之學也貞
謂正而常也一即理也孔子意曰夫剛柔變通則卦
爻動而吉凶生矣然吉凶不容並立常以正而相勝
者也吉勝凶凶勝吉雖有萬變不外一貞貞則吉勝
於凶不貞則凶勝於吉所謂惠迪吉從逆凶唯影響
也不觀之造化乎天地之道消息盈虛至變矣惟以
貞常運天垂象地效法歷萬古而不易也日月之道
晦朔弦望至變矣惟以貞常照日明晝月明夜亘萬

古而不息也然則天下之動可知矣天下之動得失
憂虞萬變無窮其貞常不易者一理而已人之動非
順乎理即逆乎理順理則吉逆理則凶勢無常而理
有定不猶天地之貞觀日月之貞明乎此吉凶之所
以貞勝也按聖人繫辭以斷吉凶原有以見天下之
動而觀其會通以行其典禮所謂典禮即貞也所謂
會通即一也故其所繫之辭從之則吉悖之則凶而
天下後世不能外也

夫乾確然示人易矣夫坤隤然示人簡矣爻也者效此者也象也者像此者也爻象動乎內吉凶見乎外功業見乎變聖人之情見乎辭

此三節推原象爻所由立吉凶所由見而歸功於聖人也確然健貌隤然順貌動乎內謂揲著求卦而值當動之爻象也功業指趨避言變即動動則變也辭即吉凶之辭孔子意曰夫天下之動固貞夫一矣人亦知一之原於天地乎夫乾天也性情確然靜專動

直氣至即達自然無為以生萬物明示人以易矣坤
地也性情隕然靜翕動闢無所煩擾順承天施以生
萬物明示人以簡矣乾坤既以易簡示人聖人憂天
下後世不能效法乾坤也因作易以教人而立象生
爻焉爻備於因重人知效天下之動也不知奇而陽
者效乾之易偶而陰者效坤之簡爻雖至變而有不
變之理以主宰於中爻非仿效乾坤之所示者乎象
具於成列人知象天下之賾也不知陽息陰消者如

戶斯闔象乾之易陰息陽消者如戶斯闔象坤之簡
象雖至賾而有至約之理以網維於內象非肖像乾
坤之所示者乎有爻象即有吉凶之辭而吉凶必借
揲著而後著如人抱著問易參伍錯綜通變極數效
像乾坤之爻象動乎著卦之內而所值或吉或凶即
見乎著卦之外所謂吉凶悔吝生乎動也此爻象之
動即變也既動乎內而為變此時雖未即措之天下
而務自此可成業自此可定利用出入百姓與能之

功業已見乎此矣然非聖人繫辭以命之則趨避終迷而功業亦無由而見是功業固見於爻象之變必得聖人繫爻彖吉凶之辭然後得失明而從違決聖人與民同患之情不畢見於辭乎此其憂世覺民之功真可比德天地矣按此章貞一二字最為精要一即天命之性也貞即率性之道也乾坤易簡者性命之原而生成萬物之大本也聖人效天法地立象繫辭者固欲天下各修其道以盡其性而至於命也故

聖人之意盡於象而聖人之情見乎辭學易者可不神明夫聖人之意與情乎

天地之大德曰生聖人之大寶曰位何以守位曰仁何以聚人曰財理財正辭禁民為非曰義

此一節是言用易之聖人體天地造化之情以為情而著之於功業者也天地無心而成化故不言情而言德德之所被無不周遍故言大德生謂物遂其生也位人君之位也仁當作人理治也孔子意曰易之

卦爻即已彰彰矣然易之所以為用者在天地則為造化在聖人則為功業以天地言之天地有大德曰生而已蓋天地之間品物萬形無所不具惟天則確然於上地則隕然於下寂然一無所為而生生不已之機隨處流行若日以生物為事是生固天地之大德矣以聖人言之聖人體天地好生之德以生天地所生之民必身膺天位然後可以贊化育而宰羣生則又以位為大寶也然大寶在位須兢業以守之而

守之則以人馬士民樂業遐邇歸心而後位可守也

守位在人須休養以聚之而聚之則以財馬家室盈
寧閭閻優給而後人可聚也至若財以聚人宜理也
則崇本業省冗費以理之辭以教民宜正也則殊貴
賤辨名實以正之民之為非宜禁也則申法令明刑
罰以禁之然三者必皆裁之於義焉蓋合於義則理
之而財得其平正之而辭得其順禁之而民格其非
庶聖人之功業與天地之大德侔矣按易之一書原

為與民同患而作故上繫首章由乾始坤成而歸之
乾坤易簡之理下繫首章復由乾易坤簡而歸之天
地大生之德得乾坤易簡之理而成位乎其中者聖
人之體也行天地大生之德而以位為大寶者聖人
之用也有體則與天地合其德有用則為天地大其
功繫易者其有望於後世有德有位之聖人也如此
哉

古者包犧氏之王天下也仰則觀象于天俯則觀法于

地觀鳥獸之文與地之宜近取諸身遠取諸物于是始作八卦以通神明之德以類萬物之情作結繩而為罔罟以佃以漁蓋取諸離

此一章是言聖人制器尚象之事而此二節言包犧氏作易以前民用而開鮮食之原也文羽毛也與地之宜諸本多有天字宜時令方隅也結繩以麻為之網所以佃罟所以漁蓋者疑詞言疑取諸此而非必取諸此也孔子意曰粵稽古昔以聖人之德履大寶

之位而能作易以前民用者昉於包犧氏之王天下也蓋羲皇藏往知來心通造化固已具一作易之本矣而又求之於俯仰遠近之內以驗陰陽消息之理故仰則觀經緯之象於天如日月星辰之屬是也俯則觀一定之法於地如南北高深之類是也至於俯仰之間即鳥獸之文觀之如剛鬣柔毛亦陰陽也希革毛毳亦消息也即天地之宜觀之如春夏則陽之息秋冬則陰之消也高者陽之息下者陰之消也近

取諸身之形體性情遠取諸物之飛潛動植而陰陽消息之理無不畢具於其中於是乃作乾兌離震巽坎艮坤之八卦焉神明之德不可見者也就健順動止八者之德以通之而凡陰陽之理深入無形者易皆與之融貫而無間矣萬物之情可見者也就雷風山澤八物之情以類之而凡陰陽之理顯及有象者易皆與之相肖而不違矣八卦既成顯微畢著聖人作易寧徒為制器而設然而制器之理總不越此古

者禽獸魚鼈多而人民少故包犧氏教民結麻為繩
以為網罟以佃於山林以漁於川澤使民知鮮食之
利焉若是者疑取諸離蓋離象為目離德為麗如網
罟之兩目相承而物麗之也按宓犧首畫八卦其神
靈益智本不待外象而著特假河圖神物以徵信兆
民耳故易之未作全易之理具在聖心易之既作天
下之理備於易書雖備物致用聖人未嘗取象於易
而究未有出於易之外者其理同也不然網罟之設

未必不在畫卦之前則又何從取兩目相承之象而求合之乎

包犧氏沒神農氏作斲木為耜揉木為耒耒耨之利以教天下蓋取諸益日中為市致天下之民聚天下之貨交易而退各得其所蓋取諸噬嗑

此二節是言神農氏之教民粒食而通有無於不匱也耜耒首也斲木使銳而為之耒耜柄也揉木使曲而為之耨除草也孔子意曰包犧之時鮮食之原既

開矣然粒食之道未備也包犧氏沒神農氏作民厭
鮮食而食草木之實於是斲木使銳為耜揉木使曲
為耒耒以運耜耜以起土設為耒耨之利而教天下
以樹藝之法焉若是者疑取諸益蓋二體皆木取益
之象其動者在下之耜而入之者在上之耒上入下
動取益之德天下之益莫大於耒耜又有取於益之
義也夫網罟設而鮮食足耒耜具而黍稷登則貨財
殖矣然有穀者或不給於鮮有鮮者或不給於穀乏

者無所取積者無所散則有無不均而所養或缺神農氏於是教民期以日中為市使之道里均趨走便而天下之民無不致矣市各聚其貨使之百物具諸用備而天下之貨無不聚矣交其所有易其所無交易而退則有無相濟彼此相通而人人各得其所矣若是者疑取諸噬嗑蓋卦德上明下動日中象上明為市象下動卦名噬嗑民不一業貨不一用致而聚之又噬而嗑之之義也按聖人立成器以為天下利

其用不止一端而繫易者必先自離次益次噬嗑其
說何耶蓋食貨乃斯民之大命生養為王政之大端
聖王圖治未有舍此而他為先圖者大傳之垂訓也
深矣

神農氏沒黃帝堯舜氏作通其變使民不倦神而化之
使民宜之易窮則變變則通通則久是以自天祐之吉
无不利黃帝堯舜垂衣裳而天下治蓋取諸乾坤剡木
為舟剡木為楫舟楫之利以濟不通致遠以利天下蓋

取諸渙服牛乘馬引重致遠以利天下蓋取諸隨重門
擊柝以待暴客蓋取諸豫斷木為杵掘地為臼臼杵之
利萬民以濟蓋取諸小過弦木為弧剡木為矢弧矢之
利以威天下蓋取諸睽

此以下是言黃帝堯舜通變宜民之事而此六節皆
創制以前民用者也剡剡之使中虛也剡削之使末
銳也弦以絲弦木也弧木弓也孔子意曰神農之時
食貨足而生養遂矣然風氣日開人心漸啟樸陋之

治不可以久也迨神農氏沒黃帝堯舜氏作三聖人
又有因時致治之道焉蓋民心之厭淳固而思變為
文明也時為之也聖人因其時之變而通之使天下
之民亶亶焉日習於其中而不倦焉然其通變之道
又不過因其自然之勢而導以自然之理若神化莫
測者然故使天下之民皆鼓舞於神化之內而安之
以為宜惟其宜之故趨之而不倦也三聖人之通變
神化若此豈有他術哉一易理而已矣蓋易理即天

之理也消息互乘盈虛迭運時處其窮則數盡必更
勢重必返未有不變者變則隨時而轉因勢而導未
有不通者通則一時適宜後世無弊未有不久者三
聖人之通變合乎易即合乎天矣是以民宜之而天
祐之吉无不利也嘗即通變而進稽其事始於黃帝
備於堯舜定為上衣下裳之制垂之於身以革上古
簡陋之俗則貴賤別而上下分民志以定恭已無為
而天下治矣若是者疑取諸乾坤蓋乾以易知坤以

簡能乾坤之變化無為也垂衣裳而天下治聖人之
變化無為也衣裳之制度既同將遐邇之嚮風恐後
苟川澤梗塞則文教有所不通於是剡木使中虛而
為舟剡木使末銳而為楫舟以載物楫以進舟舟楫
之利興而不通者賴以通矣若是者疑取諸渙蓋渙
之象上巽木而下坎水一如舟之浮出於水上也夫
川澤既通而山林阻脩則擔簦重趂負戴勞苦也於
是牛以順為道故服而馴之以引重馬以健為性故

乘而駕之以致遠而天下享安驅之利矣若是者疑
取諸隨蓋卦德下動上說猶物在下而動人在上而
說也川塗既通遠邇錯至暴客或乘而起矣於是設
為重門以禦之於外嚴為擊柝以戒之於內雖有暴
客之來而警備已密吾固有以待之矣若是者疑取
諸豫蓋取豫備之意也未耜以開粒食之原而民未
知脫粟之利於是斷木為杵而使之足以舂掘地為
臼而使之足以容杵臼之利興而萬民之養益以濟

矣若是者疑取諸小過蓋卦象上木下土杵為木臼
為土卦德下止上動如臼止而杵動也外有擊柝以
待暴客內有杵臼以精粒食而害之大者無所挾以
威之則雖有險而不能守雖有粟而不得食於是弦
木使曲而為弧剡木使銳而為矢弧矢之利所及者
遠以威天下之不軌非止重門擊柝以防之於內也
若是者疑取諸睽蓋睽乖然後威以服之也按天下
風氣既趨於文明則人心嗜慾日繁詐偽亦日甚不

予之以利無以遂其求不震之以威無以禁其暴是
故利天下者聖人之仁也威天下者聖人之義也仁
與義皆所以宜民而已矣

上古穴居而野處後世聖人易之以宮室上棟下宇以
待風雨蓋取諸大壯古之葬者厚衣之以薪葬之中野
不封不樹喪期無數後世聖人易之以棺槨蓋取諸大
過上古結繩而治後世聖人易之以書契百官以治萬
民以察蓋取諸夬

此三節是言黃帝堯舜易古制以前民用者也棟屋

脊櫨也宇椽也喪期喪哭之期也書文字也契合約

也孔子意曰凡上古未備之器而不可緩者聖人皆

尚象而創其制矣乃上古已備之器而不可用者聖

人尤必尚象而變其制如上古宮室未興冬則穴居

夏則野處風雨奄至民無寧居後世聖人易之以宮

室之制有棟以直承而上有宇以兩垂而下雖有震

風暴雨莫能侵之矣若是者疑取諸大壯蓋取壯固

之意宮室不壯則不固也宮室既具生者得以庇蔭而死者無所覆藏亦何以教民孝乎古之葬者不過厚衣之以薪葬之中野之地無封土樹木之規無喪麻哭踊之期後世聖人易之棺以周其內槨以固其外計慮久遠而無使土親膚矣若是者疑取諸大過蓋取送死大事寧過於厚也上古民淳事簡故小大之事惟結繩以記驗之亦人以為治後世風俗寢薄欺詐日生於是聖人易之以書契言有不能記者書

識之事有不能信者契驗之由是百官之功實可稽
萬民之情偽可覈而以治以察矣若是者疑取諸大
蓋取明決之意以決能決去小人之偽而防其欺也
按歷代聖人制器尚象或尚其德或尚其名或尚其
義或尚其體又或尚其道總謂之象也蓋卦者象而
已矣五聖人之制作非必觀玩於十三卦之象而為
之而孔子以為取諸云者正以日用事物之間原自
有一易之理聖人所為默與之合即邵子所為畫前

之易是也然則千萬世利用安身養生送死之道無一不由於易易豈僅為卜筮之書而已哉

是故易者象也象也者像也彖者材也爻也者效天下之動者也是故吉凶生而悔吝著也

此一章是言易之卦爻不外乎象而人當觀象玩辭以知所趨避也材卦之質也效倣也孔子意曰原夫聖人尚象之故而知羲皇既作圖書遂起於是易有小成有大成不過六十四卦三百八十四爻奇偶之

象而已然象有本體之象有一爻之象總之不滯於
跡彷彿於理之似耳如陽卦六畫之乾以卦言則所
以像夫純陽至健之理以及言則有以像夫潛見惕
躍飛亢之理陰卦六畫之坤以卦言則所以像夫純
陰至順之理以及言則或以像一陰之始生或以像
陰盛而亢陽亦各自備一理舉乾坤而諸卦可類推
矣此聖人作易立象以盡意也象既立矣觀象而繫
辭則有象象者言一卦之材也如卦德卦體卦變卦

象卦義皆其材也卦兼有善惡卦材之善者辭亦從
而善卦材之惡者辭亦從而惡而象之全體形矣於
是乎又有爻爻也者效天下之動者也如愛惡相攻
遠近相取情偽相感天下之動紛紜變化莫可窮詰
而皆爻中之所已具是以聖人一一摹倣於逐爻之
下而象之一節昭矣既有卦爻以象告又有卦爻之
辭以發揮乎象是故得失之報以明吉凶由此而生
焉憂虞之故以晰悔吝由此而著焉蓋悔吝在心未

著吉凶在事已著吉之生悔之著也凶之生吝之著也總之繫辭以盡言不外乎立象以盡意材者象之質動者象之用吉凶悔吝者象之徵也象立而易之理備矣按宓義畫象其吉凶悔吝之故已了然於心中特其時當渾穆故不顯著之於辭而止以象告至中古之世詐僞日生凡辭之所繫者皆事之所有故聖人繫之辭以正告天下曰如是則可以悔而得吉如是則必至吝而得凶使天下曉然於趨避之途則

聖人之立象繫辭皆因乎時以有功於世道者也

陽卦多陰陰卦多陽其故何也陽卦奇陰卦耦其德行何也陽一君而二民君子之道也陰二君而一民小人之道也

此一章是即少陽少陰之卦名以見聖人貴陽賤陰之意也君謂陽民謂陰孔子意曰乾坤二卦純陽純陰其畫無有多寡矣至於震坎艮皆為陽卦宜多陽矣其畫乃一陽二陰是陽卦反多陰也巽離兌皆為

陰卦宜多陰矣其畫乃一陰二陽是陰卦反多陽也此其故何也凡陽卦以一陽為一畫其二陰各二畫合之則為五畫五奇數也奇則為陽卦矣凡陰卦其一陰已二畫其二陽又各一畫合之則為四畫四耦數也耦則為陰卦矣是皆數中自然之妙非人力所能參也然數未有不本於理由數之所呈以究其理之所合則卦畫之所在即德行之所在也而其德行又有公私邪正之不同焉蓋陽道尊貴而統陰有君

之象陰道卑賤而從陽有民之象陽卦一陽而二陰則其象為一君而二民夫以一君而統二民其道大而公義之正也君子之道也陰卦一陰而二陽則其象為一民而二君夫以一民而從二君其道小而私事之變也小人之道也然則多陰者為陽卦多陽者為陰卦豈非理之一定數之自然而聖人扶抑之深意所隱寄於其中者哉從來君子雖多小人用事其象為陰小人雖多君子用事其象為陽蓋小人為君

子所制則治君子為小人所制則亂小人為君子所
制或能改絃易轍以求當乎君子之意尚可以効一
官一職之能君子為小人所制斷難敗行喪檢以求
類乎小人所為必至於成相傾相軋之漸此治亂所
由分也易之泰卦不曰有君子無小人而曰內君子
外小人然則處之得其宜用之得其道雖小人亦烏
足為害哉

易曰憧憧往來朋從爾思子曰天下何思何慮天下同

歸而殊塗一致而百慮天下何思何慮日往則月來月往則日來日月相推而明生焉寒往則暑來暑往則寒來寒暑相推而歲成焉往者屈也來者信也屈信相感而利生焉尺蠖之屈以求信也龍蛇之蟄以存身也精義入神以致用也利用安身以崇德也過此以往未之或知也窮神知化德之盛也

此四節是引咸九四爻辭以明天下感應之理屈信之機皆出自然而無所容心於其間也思者心之用

也慮者謀度其事也致極致也咸之四爻以陽居陰不能正固將以私感而害大公故其爻辭曰憧憧往來朋從爾思孔子釋之意曰天下至廣大也其一感一應之相為往來者原屬天下自然之理而不得我空虛之體則又何處可用吾之思用吾之慮哉蓋天下之理原於太極本同歸也但一涉於事物則所感者多其塗各殊究之塗雖殊而歸則同天下無二理也理根於人心本一致也但既接乎事物則所應者

分慮亦有百究之慮雖百而致則一天下無二心也
夫理無二理心無二心則順理行之因心付之足矣
信乎何處可用吾之思用吾之慮而以憧憧為哉試
以天運觀之因日之往而有月之來因月之往而有
日之來二曜相推以相代則明生而不匱因寒之往
而有暑之來因暑之往而有寒之來二氣相推以相
繼則歲成而不缺夫日月寒暑之往者不待思而往
乃氣機之消而屈也日月寒暑之來者不待思而來

乃氣機之息而信也一屈一信即造化相感不已之機而明生歲成之利於是乎生焉是屈信往來孰非感應自然之常理乎因天運而推之物理莫不皆然如尺蠖之行也不有所屈則不能有所信其屈也自有求信之理不待思慮而信也龍蛇之在冬也不蟄而伏其氣則不能存其身其蟄也自能以存其身不待思慮而存身也豈特物理為然哉即驗之聖學亦有自然之機也夫天下事物之感不齊而心能裁制

之即為義心之所感不一而義能變通之即為神精
研其義至於入神其於事物之所宜靡不洞察而臻
於神妙之地則心不外馳入者不出內之屈也而見
理明徹自有以推極其外之用屈之感信也既足以
致用而用無不利則應事接物隨其所遇迎刃而解
而身之所履無適不安外之信也而動作得宜自有
以增崇其內之德信之感屈也夫屈信往來無往非
交養互發之理功在於此而效見於彼則亦何在可

容吾思慮之擾其間哉夫義求其精用求其利此其
機在我可知者也由此內外之間交養互發自有欲
罷不能者矣自是以上惟有待其天機之自至而絕
非人功之可加又豈我之所能知哉蓋窮極天地之
神而與合一不測者共藏其域通知天地之化而與
推行有漸者冥契其機始而入神至此神已窮矣始
而可知至此知已化矣皆由其德之盛故能窮神知
化如斯也豈徒崇之已乎夫交養互發之機熟之又

熟而至於不知者往而屈也神化合一之妙忘之又
忘而至於自致者來而信也是亦皆感應自然之理
而非思慮之所能及也按咸之象以虛為義至虛之
中無不同焉無不一焉然推之晦明寒暑往來屈信
之理則同之中有至不同者存一之內有至不一者
存此神化所由生也故又推之精義利用及於窮神
知化以明同者惟通不同為同然後其同可通一者
唯合不一為一然後其一可合孔子之一貫是也若

夫俗學之失固患乎思慮之紛紜而異端之學又誤
執何思何慮而流入於虛無寂滅將何以致用崇德
而窮神知化乎故九五之志末與憧憧同戒也

易曰困于石據于蒺藜入于其宮不見其妻凶子曰非
所困而困焉名必辱非所據而據焉身必危既辱且危
死期將至妻其可得見耶

此一節是引困六三爻辭以戒小人不當揜抑君子
而自貽伊戚也易困卦之三爻以陰柔之質上揜四

下揜二欲困人而卒自困故其爻辭曰困于石據于
蒺藜入于其宮不見其妻凶孔子釋之意曰困之六
三以陰柔不中正是無才德之小人也而居九四之
下四之剛堅重不撓足以壓制夫三石之象也三不
自量其力而思傾陷乎四之下欲乘其隙而奪之位
是非所困而困焉必至公論不與而名辱又居九二
之上二之剛英銳難近不甘依倚乎三蒺藜之象也
三不外度其人而思盤據于二之上欲憑其權以搯

其腕是非所據而據焉必至貫盈禍至而身危夫名
既辱身且危死无日矣雖上六正應有妻之象然
身且不能保其能有其妻耶故妻不可得而見明上
六之親暱亦不為三應也按君子有不幸之困非其
所自致身雖危而名不辱小人欲陵君子卒必至於
自困以至名辱身危何如安分自守人已兩全之為
愈哉易不唯為君子謀其為小人謀者亦至矣

易曰公用射隼于高墉之上獲之无不利子曰隼者禽

也弓矢者器也射之者人也君子藏器於身待時而動何不利之有動而不括是以出而有獲語成器而動者也

此一節是引解上六爻辭以明君子當善藏其用也藏收斂不露之意括結礙也成完全無缺也易解卦之上爻居公孤之位而能解除六三之悖惡故其爻辭曰公用射隼于高墉之上獲之无不利孔子釋之意曰隼者鷙害之禽也弓矢者射禽之器也射之者

操弓矢以射隼之人也解悖之義底唯君子得之君子抱經邦濟世之才是蓋藏其利用之器於其身也歿鋒斂鐸不先不後待其時之可為而動則其器已素具矣何不利之有若是者正以其藏而後動故其動自利而無足為我括一出則驚害以除而有獲矣然則解上爻之語正言公之能善藏以成其器謀出萬全動無結礙是以獲之无不利也按君子之待小人常疎小人之伺君子常密必藏器以待使之不疑

不忌而後可乘時以制其命大舜之去四凶孔子之誅少正卯不動聲色而成功於俄頃率是道也

子曰小人不恥不仁不畏不義不見利不勸不威不懲小懲而大誡此小人之福也易曰屢校滅趾无咎此之謂也

此一節是引噬嗑初九爻辭以明人君當懲戒小人使之遠於罪戾也孔子意曰仁載於心心莫患乎無恥小人唯不恥不仁故其心入於不仁義著於事唯

其不恥不仁故其所為之事常不畏夫不義之名既
至於不恥不畏則其中蕩然無名教之可懼而無所
不至然小人雖愚彼其初原不知仁義之為利而不
仁不義之深為害也苟歆之以所利而怵之以所害
彼其趨避之情當必有翻然悔悟者矣故不見利則
不勸於仁義不見威則不懲於不仁不義是利與威
正人君懲誠之大權也始之懲其小不仁不義於其
前而終能誠其大不仁不義於其後此懲之誠之所

以造小人之福也易曰屢校滅趾无咎此小懲大誡之謂也按天下之小人非必生而怙終者也大約進無所慕退無所懼流於極惡而靡所底止使有國家者早明勸懲之典則斯世不受僉壬之禍而小人亦得以蒙其福必至於刑措而不用矣

善不積不足以成名惡不積不足以滅身小人以小善為无益而弗為也以小惡為无傷而弗去也故惡積而不可掩罪大而不可解易曰何校滅耳凶

此一節是引噬嗑上九爻辭以明善惡視其所積而禍機伏於所忽也孔子意曰善者成名之機也不積則不足以成名惡者滅身之媒也不積則不足以滅身小人之心不知小善之可以積而至於大善也但以為无益於名而弗為也又不知小惡之可以積而至於大惡也但以為无傷於身而弗去也夫善既不為惡又日積則穢德彰聞漸不可掩惡極罪大豈復能解乎易曰何校滅耳凶由滅趾不防而至於滅耳

也夫安得而不凶哉按旅葬之訓曰不矜細行終累大德為山九仞功虧一簣漢昭烈之戒子曰勿以善小而弗為勿以惡小而為之蓋言積小以致大也至若聖賢之學致謹乎隱微不愧於屋漏又豈待小善小惡之著而後兢兢哉

子曰危者安其位者也亾者保其存者也亂者有其治者也是故君子安而不忘危存而不忘亡治而不忘亂是以身安而國家可保也易曰其亡其亡繫于苞桑

此一節是引否九五爻辭以明人君常存戒懼之心則能永享天位而固國勢於不傾也孔子意曰凡圖事宜謀其甚全存心貴操其不足故必使其心若危危者乃所以安其位者也使其心若亡亡者乃所以保其存者也使其心若亂亂者乃所以有其治者也君子深鑒其故雖海內寧謐可謂安矣而常慮位之不可久安不忘危之將至也宗社鞏固可謂存矣而常慮存之不可屢倖不忘亡之或及也紀綱釐舉可

謂治矣而常慮治之不可徒恃不忘亂之漸萌也夫
既不忘有危有亡有亂之時則必圖所以安之存之
治之之策是以身之位得以安而國家可保其久存
長治也易曰其亡其亡繫于苞桑玩爻辭而益加儆
惕矣按唐虞之時可稱極盛然禹有慢遊傲虐之戒
益有怠荒逸樂之箴至若伊尹儆太甲以恒舞酣歌
召公訓武王以玩物喪志賈誼陳治安策於文帝之
朝魏徵上十漸疏於太宗之世李沆處真宗太平之

日而惟以水旱盜賊為言耶律楚材當太祖開創之初而日以生民休戚為告豈故為是已甚之辭哉惟其日慮夫亂亡故能保世於長久然則其亡二語真萬世有天下者之金鑑歟

子曰德薄而位尊知小而謀大力小而任重鮮不及矣易曰鼎折足覆公餗其形渥凶言不勝其任也

此一節是引鼎九四爻辭以明小人不量才德而貪位圖功必至於覆國亡身也孔子意曰凡居位必視

乎其德謀事必視乎其知責任必視乎其力若夫德薄者位亦宜卑知小者謀亦宜小力小者任亦宜輕此理之常也苟始之不自審其德之薄而貪夫尊位位既得矣又不肯自揣智力之所不足而謀大任重務為好大喜功之論以飾其愚而固其位則敗可立見而位亦旋失不特身名俱喪公家之餽由此覆矣易曰鼎折足覆公餽其形渥凶蓋言其位雖尊而才德不足以勝其任也按古聖賢出處之際必先內度

之已外度之君雖卑位微秩亦必勝其事而後食其
祿況身秉國鈞事關民社豈可不自度量而漫然處
於其上乎然用人者人君之事則又當辨才授官不
使有尸位素餐之誚此大傳之微旨也以上六節五
節皆言小人之事困之三爻以小人而圖君子者也
解之上爻以君子而圖小人者也噬嗑之初爻小人
之未遂其非僻者也噬嗑之上爻小人之已陷於大
惡者也鼎之四爻小人之貽患於家國者也聖人或

危之或幸之或指示之或哀矜之或憂慮之總欲使之安其分而不為天下之害御小人者其亦知所以善處之道哉

子曰知幾其神乎君子上交不諂下交不瀆其知幾乎幾者動之微吉之先見者也君子見幾而作不俟終日易曰介于石不終日貞吉介如石焉寧用終日斷可識矣君子知微知彰知柔知剛萬夫之望

此一節釋豫卦六二爻義也孔子意曰凡人於處事

接物之間其幾必有先動者人心至神本無不燭唯
心有所蔽則當幾而不知苟此心空洞無物自然隨
觸而覺未有不知幾者知至於幾其神矣乎夫上下
之交莫不有幾存焉與上交固貴於恭遜然恭遜之
過便近於阿附而為諂與下交固貴於和易然和易
之過便近於褻狎而為瀆所爭在幾微之間耳唯君
子上交而不至於諂下交而不至於瀆於事理一定
之權衡審之極其精而行之無少過其真知幾乎夫

所謂幾者乃天理之萌動其動至微兆而未著苟順適其幾無有不吉此吉之先見者也衆人所不及察唯君子見之君子一見此幾即作而趨之有不俟終日者蓋稍涉濡遲則失其所為幾而違其所為吉矣易曰介于石不終日貞吉言人赴幾之不速由於心溺物欲而不能靜見涉依違而不能斷苟其介然如石焉無欲而靜堅確而不可移則理定而智圓守固而行決斷可識其不俟終日矣蓋天下之理有隱潛

而微者有顯設而彰者人之處事有巽順而柔者有
勇決而剛者人知乎此方能知幾今君子既知其微
又知其彰既知其所以柔又知其所以剛四者既知
則無所不知所以為萬夫之望此真所謂知幾之神
也按繫辭釋豫卦六二爻而言上交不諂下交不瀆
者以豫之九四不中不正為豫之主初與之應三與
之比皆諂乎四六二中正自守在初與三之間上交
不諂也初六鳴豫凶不正者也六二雖與之比中正

而不瀆慢下交不瀆也此所謂知幾也乃知易之理不外於知幾而知幾實難必靜止之功成於內然後光明所燭能得於義理之精微應事接物無少過差動與吉會始為知幾之君子也

子曰顏氏之子其殆庶幾乎有不善未嘗不知知之未嘗復行也易曰不遠復无祇悔元吉

此一節釋復卦初九爻義也顏氏之子謂顏回也庶幾言近道也孔子意曰人自繼善成性以來止有一

善但為氣稟物欲所拘蔽乃漸失其本然矣唯聖人之心純乎至善與道為體賢人之心復其本善底幾近道若及門之顏回其殆底幾乎回不必有顯形之過方其念慮之間或稍有間雜有非繼善之初者即為不善也回於不善之動當體即知無有蒙昧而不及察有不善未嘗不知不待迷而後覺也知其不善之動當幾即克無或遲留而不遽改知之未嘗復行非失久而後復也易曰不遠復无祇悔元吉蓋初九

一陽來復復之最先所謂不遠之復不至於悔大善而吉者即顏氏子之學也乃知人性之善以能復為功復性之學以知行為要有不善而不知不可言行知不善而復行不可言知如顏子之學知行合一庶幾復性之功乎

天地絪縕萬物化醇男女構精萬物化生易曰三人行則損一人一人行則得其友言致一也

此一節釋損卦六三爻義也絪縕濃密也醇凝厚也

構交也致一言專一也孔子意曰造化之生機與人
類之事為莫不合兩為一以盡變化而成功能試觀
天地本兩也及其以氣相交陰陽絪縕濃密無間則
兩而一矣而萬物之以氣化者於是醇厚而不漓焉
男女本兩也及其以形相交陰陽施受精氣感通則
兩而一矣而萬物之以形化者於是生生而不息焉
夫天地男女所以成化醇化生之功者以其絪縕構
精專一而不二也易曰三人行則損一人一人行則

得其友損一人者兩也得其友者亦兩也兩相與則專一若三則雜亂不能成功損其間吾兩之人所以致吾兩者之專一也言致一也按損卦以卦象言三陽三陰地在中文上下皆天有天地絪縕之象以上下二卦言少男在上少女在下男止女說有男女構精之象故以天地男女言之六三與上九相應志氣專一故曰致一而本卦六爻應與亦各陰陽相配無非致一也此造化之生機人事之功用所不能外也

子曰君子安其身而後動易其心而後語定其交而後求君子脩此三者故全也危以動則民不與也懼以語則民不應也无交而求則民不與也莫之與則傷之者至矣易曰莫益之或擊之立心勿恒凶

此釋益卦上九爻義也動見諸政事也易坦易也語施諸號令也求取諸賦稅也孔子意曰取益之道在於有恒如臨民出治則有動而君子不遽動也去欲循理以安其身使大中至正畧無偏陂而後萬事萬

變慮善而動焉發號施令則有語而君子不遽語也
平情抑氣以易其心使坦適從容畧無詭戾而後有
體有要因時而語焉制國家之用則有求而君子不
遽求也待民若子以定其交使上下感通畧無疑貳
而後度地制賦循分而求焉安其身易其心定其交
君子脩此三者則取益之道全故動則民悅語則民
信求則民與不求益而自益矣若理不足以勝欲則
危危以動是自處於可危之地而驟欲動民民誰與

而從之心不足以制氣則懼懼以語是我實不德而告令以空文未免有恫疑之心民誰應而奉之有相臨之分無相感之情則无交无交而求是恩無所施而徒責其報民又誰與而供之至於莫之與則不但
不與而已以身發財爭民施奪而傷之者至矣此易之所云莫益之而或擊之由於立心之勿恒是以凶也夫益下者君道之恒有恒者益之本也益之上九陽居益之極求之不已而專於利已則失其恒無恒

即無益矣此周公所以為殖貨者戒而孔子復詳以釋之使後之君子知立恒以取益也

子曰乾坤其易之門邪乾陽物也坤陰物也陰陽合德而剛柔有體以體天地之撰以通神明之德

此一章言聖人本陰陽以作易明造化之理示人事之得失也此一節言卦爻之畫從乾坤而出備於理而妙於用也物言有形質也撰猶事也有形可擬曰體有理可推曰通孔子意曰易始乾坤凡六十四卦

三百八十四爻皆從此變化而出然則乾坤者其易書諸卦爻之門邪夫一陰一陽之謂道陰陽不可見聖人畫奇為乾以象陽之健是乾乃陽物也畫偶為坤以象陰之順是坤乃陰物也以陰陽之德言則陰與陽合陽與陰合交錯往來而二物相得其德合矣以陰陽之體言則剛自為剛柔自為柔各成其質而二物對待其體立矣由是形之可見者如雷風山澤之類易則一一象出之無不形容其似是天地之撰

以易而體矣理之可推者如健順動止之類易則一
一顯出之無不發揮其妙是神明之德以易而通矣
總之易之為言陰陽往來而已六十四卦乾坤往來
而已言其合而未嘗不分言其分而未嘗不合聖人
作易因其自然之往來自然之分合為之陳其數而
備其義體天地通神明而不外乎陰陽二物此乾坤
為易之門也

其稱名也雜而不越於稽其類其衰世之意邪

此一節言易書卦爻之辭不出陰陽之變亦因時而作也越踰越也類事類也孔子意曰太始以來唯有陰陽而窮極理數至於不可勝紀於是一卦有一卦之名一爻有一爻之名或言物象或言事變其稱名也可謂紛然雜出矣而總不出乎陰陽之變是稱名雖雜而未始有踰越也然嘗稽考其事類所以盡萬物之變者似非上古民淳俗朴不識不知之語也蓋文王周公見中古以來人心日澆迷謬愈甚乃繫卦

爻之辭示吉凶之義憂患後世之意甚深且切其衰
世之意邪乃知聖人制作因乎其時當伏羲之畫卦
凡事物之變已無不具於其中特上古質朴無用費
辭至後世人情物態無所不有文王周公目擊身歷
慮之也深故言之也詳易之道乃無餘蘊亦時之不
得不然也

夫易彰往而察來而微顯闡幽開而當名辨物正言斷
辭則備矣

此一節承上雜而不越而更言其理之備也按本義云而微顯恐當作微顯而開而之而亦疑有誤彰彰明也闡闡發也孔子意曰易既雜而不越則理無不備如天道之已然者謂之往而易書卦爻之變象於陰陽消息已然之理皆有以彰之人事之未然者謂之來而易書卦爻之占辭於吉凶悔吝未然之幾皆有以察之日用所為者顯也易則推其根於理數之幽使顯者至微蓋以人事本之天道也百姓不知者

幽也易則發其端於事為之顯使幽者畢闡蓋以天

道用之人事也天下不可亂者名分易則於君臣父

子之分貴賤上下之等各當其位矣天下不可混者

物類易則於乾馬坤牛離火坎水之類各辨其似矣

以明卦爻之義則有言易之言皆本典常之道以發

之無不中正言之正也以告吉凶之故則有辭而易

之辭皆因得失之情以判之無有回惑辭之斷也蓋

易之理精及無形粗及有象無弗備矣而要其所以

備者即陰陽二物有以體其撰通其德也乾坤不信
為易之門耶

其稱名也小其取類也大其旨遠其辭文其言曲而中
其事肆而隱因貳以濟民行以明失得之報

此一節承上節言理之備而詳論其妙也肆陳也貳
疑也報猶應也孔子意曰易辭纖悉無遺其稱名嘗
小矣然其所取之類皆本於乾之陽坤之陰何其大
也天地陰陽道德性命散見於諸卦爻之中其旨甚

遠矣而其所繫之辭經緯錯綜煥然明白何其文也
凡委曲其辭者未必皆中於理而易之言多委曲矣
乃適當於義理之極致何其曲而中也將以迪人從
也凡敷陳其事者無有隱而不露而易之於事大小
本末無有不該極其敷肆矣然至理貫於其中未易
窺測何其肆而隱也將以啟人思也易書之曲盡其
妙如此蓋後世民心不古情偽愛惡相感相攻而吉
凶相雜疑貳紛然莫知趨避聖人因其疑貳之情欲

濟其行之所不及故作易定吉凶以告人明其失得之報使知所趨避所以濟民之陷溺者端在乎此聖人慮民之心深矣乃知乾坤二卦已包三百八十四爻而文王周公卦爻之辭即伏羲之畫先天盡意後天盡言而聖人開物成務之功無不同也

易之興也其于中古乎作易者其有憂患乎是故履德之基也謙德之柄也復德之本也恒德之固也損德之脩也益德之裕也困德之辨也井德之地也巽德之制

也

此一章是言易有處憂患之道在於反身脩德而此
二節原易之所由興因舉九卦之德以明其序也中
古謂文王時文王拘於羑里而繫彖辭孔子意曰易
自羲皇而肇其來遠矣然夏商之末其道中微易之
復興也其在中古之時乎當是時文王以盛德而蒙
大難因演易六畫之卦而繫之彖辭以垂教萬世操
心危而慮變深其有憂患之思乎夫以憂患之心作

易則處憂患之道莫備於易矣要其道無如反身脩德而脩之有序大約於九卦可槩見焉是故德莫先於立基必謹於踐履之實則身心有所受治而可以為積累之漸履非德之基乎德基始立一有驕亢之念即至隳壞必守之以謙退則有所執持而不失謙非德之柄乎既有執持又必於念慮之萌時時審幾而反復於善以存養其本體故復為德之本本既在我而不能常守雖得必失又必其守之也恒久不變

始安固而不搖故恒為德之固然持守雖固私欲或未盡去也損則懲忿窒慾以去其所本無德於是乎脩焉然脩省雖嚴天理或未盡純也益則改過遷善以克其所固有德於是乎裕焉德既至於充裕則可自驗於處境矣蓋當困時凡進退語默取舍辭受之間最可觀德當義則是違理則非是困為德之辨也德至於可以處困則可施以及物矣蓋性體常定始終無改而應變不窮如井之澤及於物而未嘗動焉

故并為德之地也至此則凡事之來能以心順入於其理而裁制得宜蓋事理之細微曲折非此心巽入則所見必有未徹不無幾微之失惟順而能入斯化裁盡妙此巽所以為德之制也哉凡此九卦皆反身脩德以處憂患之道也要之聖人之德純亦不已心與易會自居平以及處憂患無非全體乎易豈僅以此九卦為反身脩德之事哉孔子第就處憂患之道而舉其近似者言之為萬世學易者之法可以見德

之有序而其用無所不備耳

履和而至謙尊而光復小而辨于物恒雜而不厭損先難而後易益長裕而不設困窮而通井居其所而遷巽稱而隱履以和行謙以制禮復以自知恒以一德損以遠害益以興利困以寡怨井以辨義巽以行權

此二節是言卦德之妙而因以著聖人之用易也物指衆陰言設是施為之意孔子意曰易以九卦為反身脩德之序而其德之兼體用而咸備者固無乎不

宜也履之為道君臣上下固以各得其所為和矣而
平易近情之中無非天理民彝之準蓋至極而無可
加也謙之為道卑以自牧固未嘗自處於尊而心愈
斂則望愈崇自光顯而不可掩也復以一陽動於羣
陰之下善端甚微似易為物之所淆而理欲界限判
然分明不既辨於物乎事變之來雜然不一每易至
於厭怠惟德能有恒則雖處紛擾而所守常定何厭
之有乎損主懲忿窒慾其功固先有所甚難矣而克

治既久馴至私累自消後何易耶益主遷善改過其
勢固滋長而充裕矣然積累之基皆吾固有何待於
施設耶身雖處困而道不與之俱困無入不自得者
此其窮而能通也立於不動而可以應天下之動及
物而不窮者井之居而能遷也至於巽以應事能劑
量萬物之宜而稱物平施不見表暴之迹乃所謂稱
而隱者也卦德之妙如此以觀於其用則何如行已
若不以禮遂至乖戾惟由於自然之節文則有從容

順適之休此行之所以和也非履何以哉行禮若無
節制亦為虛器惟出之以卑遜而自合於範圍之節
此禮之所以得其制也非謙何以哉善端所存在於
一念憬然自覺而其幾自此日進則復實以之植德
之方在於始終純一無間而不為事物所奪則恒實
以之欲之日長也其為德之害甚大有以遠之而非
幾不至於冒貢矣道在於用損德之當脩也其為身
心之利何窮有以興之而積累自此日崇矣道在於

用益用困之道以自處則能盡其在我而隨遇皆安
自無容其怨尤之意非所以寡怨乎用井之道以處
物則安而能慮而事至吾前自不淆於是非之正非
所以辨義乎若夫巽順在中則與道為體雖處變事
而能委曲合宜此則權之所以行而巽之用為至也
卦德之用如此自非聖人能全備是德何以能處憂
患而裕如哉按易卦屯坎蹇皆有處憂患之義而此
不之及聖人處常處變總一脩德而已如履謙復恒

諸卦之德豈待遇險難而後力行若以憂患言則困而不失其亨即困之一卦已不勝用矣此章隨舉九卦正以見聖人之體用無不備而易之理無往不宜也

易之為書也不可遠為道也屢遷變動不居周流六虛上下无常剛柔相易不可為典要唯變所適其出入以度外內使知懼又明於憂患與故无有師保如臨父母初率其辭而揆其方既有典常苟非其人道不虛行

此一章專論玩辭觀變為學易之事而深有望於其人也遠猶忘也不可遠猶言不可離不居猶不止也六虛六位也位未有爻曰虛卦雖六位而剛柔爻畫往來如寄非實有也故以虛言出入者以卦內外體言出者自內之外往也入者自外之內來也方道也孔子意曰聖人之作易也其書所載皆天地自然之理而人生日用之不可須臾離者豈可遠乎蓋易以中正有常之則而隨時運動其為道也屢遷矣道不

外乎陰陽陰陽變動而不居其所常周流於六虛位之間或自上而降或由下而升而上下之無常或柔來而文剛或剛上而文柔而剛柔之相易此豈可以典要拘之哉唯隨時變易以從道適得其宜而已易既惟變所適故其卦體之一出一入皆道之確然不可踰者範圍乎一定之矩所謂度也度之所在使人知消息盈虛理出處進退之宜出外入內惕然知所戒懼而不敢妄有踰越此其為教彰彰矣而且於出

入以度之中又獨明憂患之事與所以致憂患之故而一一詳切示之使人不致迷其所往故居則觀象玩辭動則觀變玩占莫不惕然恐懼雖无師保之儆戒儼如父母之臨於其上而不敢玩忽則於知懼之中更有懼焉易之示人深切如此其可遠耶故善學易者始由卦爻既變之辭而度卦爻之理則出入之度憂患之故確有定向而不可為典要者今則既有典常可以遵而行之矣然人之由辭以達變者於無

定之中而求有定之體即於不變之理而神其至變
之用是在於人之神而明之推類而長之也苟非其
人則易道雖日在天下而豈能虛行哉蓋古者作易
以通神明之德類萬物之情參伍錯綜固有以極天
下之變而為義類之所宗所謂百姓日用而不知者
也自非極深研幾之哲則不能由辭以得其意而有
以盡易之妙矣此道之所以重有待乎其人也

易之為書也原始要終以為質也六爻相雜唯其時物

也其初難知其上易知本末也初辭擬之卒成之終若夫雜物撰德辨是與非則非其中爻不備噫亦要存亡吉凶則居可知矣知者觀其彖辭則思過半矣

此一章專論爻畫之義以示人而此四節首言立卦生爻之義又析六爻之蘊而揭其要也質以卦體言時謂六位之時物謂陰陽中爻卦中四爻也彖辭統論一卦六爻之體者也孔子意曰易之為書卦立而爻生焉是以全體而妙大用者也然卦有定體而爻

無定用原其一畫之始以要其六畫之終則內外剛柔無不畢備卦之體質立矣至卦有六爻或陰居陽位或陽居陰位相雜而成用則唯六位之時不同而事物亦異陰陽各以時成豈有定體之可執乎故以時物之見於初上二爻者言初則理微而難知上則理顯而易知蓋初為卦之本其質未明上為卦之末其質已著本末之分也惟難知故初爻所繫之辭必取其象與占而極擬之惟易知故上爻之終但因初

之象占而卒成之固無煩於擬議也夫初上既足該
始終之時物矣若夫陰陽躋亂之物雜而陳之剛柔
中正之德撰而出之物有純有雜則辨其物中之是
與非德有當有否則辨其德中之是與非若是者以
類萬物之情以通神明之德以明失得之報洵非中
四爻不備也總而論之六爻既備則天道存亡人事
吉凶之理具焉噫人亦要其存亡吉凶之所歸則六
爻之義居然可洞晰而無疑矣又況於知者能見事

於未形雖不必徧觀六爻但觀卦首之彖辭則存亡
吉凶之理具於全體中者已得其槩所思不已過半
矣哉要之天下不皆知者所以聖人作易既設卦而
復陳爻舉凡天道之消長人事之得失闡發詳明使
天下後世知所趨避此聖人所以立開物成務之極
也

二與四同功而異位其善不同二多譽四多懼近也柔
之為道不利遠者其要无咎其用柔中也三與五同功

而異位三多凶五多功貴賤之等也其柔危其剛勝邪

此二節又申論中四爻之義也近謂四近君也柔指六言剛指九言孔子意曰易書卦爻之義蘊固理無不備矣更以二四言之二與四皆陰爻同有柔順之事功然所處之位則異故其善有不同二多聲譽而四則多恐懼焉蓋四之位近於五動則有逼上之嫌所以多懼也然論柔之為道必附陽剛而後能自立遠則難援本不利於遠者二柔而遠於五乃其要歸

於無咎而多譽則以二居下體之中其用柔得中故也夫觀二之多譽由於得中則四之多懼又豈獨以近君之故乎更以三五言之三與五皆陽爻同有陽剛之事功然所處之位則異故三多凶危而五則多功能焉蓋五為君位而貴獨操得為之權三為臣位而賤有難自擅之勢貴賤之等殊也要之三五皆陽位以柔居之懦弱不足以有為三固多凶五亦安能多功鮮有不危者矣惟以剛居之強毅始足以有濟

五固多功三亦不至多凶豈有不能勝其事者耶夫
遠近貴賤物也剛柔中正德也懼譽凶功是非之辨
也惟中四又悉備之學易者洵不可不加之意也觀
孔子之言是可見人臣當以剛中之德佐君有為而
人君任天下之重臨御兆民日有萬幾尤必剛健奮
發以作於上則股肱良而庶事康天下未有不治者
矣

易之為書也廣大悉備有天道焉有人道焉有地道焉

兼三才而兩之故六六者非它也三才之道也道有變動故曰爻爻有等故曰物物相雜故曰文文不當故吉凶生焉

此一章言易具天地人之道也變動謂卦之一體非指陰陽老少之變也物指陰陽言不當謂爻不當位也孔子意曰易之為書以統體言則渾淪而無外極其廣大以條理言則細密而無遺又悉備也蓋天下之道天地人盡之矣方易之三畫成卦上畫有天之

道焉中畫有人之道焉下畫有地之道焉是三畫已
具二才矣又兼三才而兩之故有六畫是六畫者非
它也上二爻即天道之兼陰與陽中二爻即人道之
兼仁與義下二爻即地道之兼柔與剛固三才之道
也夫道之變動不居如乾之六畫潛見惕躍飛亢之
類各得卦之一體是皆道之變動而謂之爻爻有遠
近貴賤之等級森然齊列判然分晰故謂之物物之
剛間乎柔柔間乎剛六位雜陳經緯燦然故謂之文

是文也有柔居剛位剛居柔位而未必當者亦有純
剛純柔而位未必皆當者故吉凶生於其間而為人
事得失之象焉是則爻也物也文也吉凶也皆道之
所出而三才之所統貫也易誠廣大悉備矣哉按孔
子以天地人為三才才之為言以其能有為而為萬
物之所利賴也天地以覆載萬物為功聖人承天地
以成萬物使莫不得其所故中庸言至誠盡人物之
性而可以參贊化育斯所以統三才而建極也歟

易之興也其當殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要无咎此之謂易之道也

此一章原易興於文王而發其所以教人之旨也孔子意曰易之所從來遠矣其復興也時當殷之末世周之盛德而其事當文王與紂之事耶蓋末世則人之詐偽滋熾盛德則易之道有自傳文王以聖人之盛德為紂囚於羑里於是處憂患而作易故其所繫

之辭皆有危懼之意凡危懼者能使之平安亨利吉无咎是也慢易者能使之傾覆悔吝凶害是也蓋出於理勢之自然若或使之是其道為甚大舉天下百物之理平未有不生於危傾未有不生於易者禍福之由皆有必然誰能廢之故文王之作易不過教人以危懼存心終如其始則其要歸於无咎而有平無傾矣此之謂易之道也此聖人與民同患之心存於易書之內者也按孔子又嘗言天之生物必因材而

篤哉者培之傾者覆之而書仲虺之誥亦以殖有禮
覆昏暴為慎終惟始之戒其與此之言危平易傾懼
以終始義有相發明者矣

夫乾天下之至健也德行恒易以知險夫坤天下之至
順也德行恒簡以知阻能說諸心能研諸侯之慮定天
下之吉凶成天下之亹亹者是故變化云為吉事有祥
象事知器占事知來天地設位聖人成能人謀鬼謀百
姓與能

此一章總言作易教人之功而此四節先言聖人體
易簡之理於心可以無卜筮而知吉凶次言聖人作
易以成天地之能而使百姓皆與其能者不外此易
簡之理也德是乾坤蘊諸心者行是乾坤見諸事者
侯之二字衍文亶亶是不倦於趨避之意孔子意曰
夫易乾坤而已矣自其純乎理者名乾乾則自強不
息天下之至健也以此至健之德見之於行易固易
也即難亦無弗易而見為恒易易本無險故凡險之

幾舉歸坐照以坦蕩明白之衷燭之而有餘不待險
而知自能見險而不陷也自其順於理者名坤坤則
安貞無為天下之至順也以此至順之德見之於行
簡固簡也即煩亦無弗簡而見為恒簡簡本無阻故
凡阻之幾無不洞晰以卑約敬慎之念處之而無碍
不待阻而知自能遇阻而不困也然此知險知阻豈
徒知之而已哉是有其能矣聖人於未事時心與理
會融洽於中而莫可言喻能以易簡悅諸心焉及應

事時理因慮審精晰於中而無所參雜能以易簡研
諸慮焉惟悅心是以吉凶之理皆吾心所素藏險阻
與否無不先知之而吉凶有不定乎惟研諸慮是以
趨避之幾皆吾慮所密察險阻與否無不預決之而
亶亶有不成乎夫既悅心研慮定吉凶成亶亶而其
自然之知又可進推矣是故在天道有盈虛消息而
變化以成在人事有語默動靜而云為以起此理之
顯者也至天道人事各有吉事必有禎祥以徵其感

應如變化有吉則祥徵見於垂象云為有吉則祥徵
動於四體此理之微者也其在聖人理之顯者循迹
觀變比擬其象於既往則一定之理所謂器者周知
而不爽矣理之微者窮幽察隱推驗其占於將然則
先兆之幾所謂來者早知而不惑矣若是者聖人之
能事不假卜筮而知吉凶百姓何由與能乎試觀天
地設位日以易簡之理昭然示人不能使人皆以易
知險以簡知阻是其能猶缺陷而未成也惟聖人闡

明此理畫卦繫辭作為易書贊天地所不及教萬世
於無窮以成天地之能焉由是人欲定吉凶成亶亶
者既先人謀以審其是非而趨避未決又抱著問易
繼之以鬼謀則吉凶可定亶亶可成而聖人知險知
阻之能百姓雖愚皆得與之此聖人所以成能者也
要之成能者成之以此易此簡而與能者亦不外此
易知險簡知阻之能也已

八卦以象告爻象以情言剛柔雜居而吉凶可見矣變

動以利言吉凶以情遷是故愛惡相攻而吉凶生遠近相取而悔吝生情偽相感而利害生凡易之情近而不相得則凶或害之悔且吝將叛者其辭慙中心疑者其辭枝吉人之辭寡躁人之辭多誣善之人其辭游失其守者其辭屈

此三節首二節言聖人成能之事使人由卜筮以知吉凶末節即人之辭以明卦爻之辭也告告此險阻言言此險阻也相攻是兩情相觸相取是強為要結

叛背理也疑可否未決枝兩岐不一失其守無操持也孔子意曰夫聖人成能其事何如天地之精非畫無以示先天畫八卦或以純陰純陽之象告或以雜陰雜陽之象告矣卦畫之蘊非辭無以發後天係爻象或以全體之情言或以一節之情言矣夫象所告情所言不過欲人知險知阻以趨避吉凶耳而吉凶於何見之卦爻中剛柔雜居如初三五剛也或雜之以柔二四上柔也或雜之以剛雜居而當位中正則

順理而得雜居而不當位不中正則逆理而失吉凶
不於此昭然可見乎然是吉凶也由象辭以見其體
必因變占以達其用方揲著求卦之初陰陽老少變
動而未定雖未成卦爻而趨避之利已寓言吉固利
言凶而使人避亦利也及求卦既成占決已著遂分
吉凶卦爻之情有消息當否之異而辭之吉凶因焉
非以情遷乎情遷何如如卦爻中正相與是愛相攻
也情孚而理順故吉生如不以中正相與是惡相攻

也情乖而理拂故凶生吉凶以愛惡之情遷矣至於

吉凶未判曰悔吝吉凶方萌曰利害又何從主也以
遠相取則情雖合而病於疎以近相取則情或睽而
嫌於妄悔吝不由此生乎以情相感則交以道義而
利生以偽相感則合以私邪而害生利害不由此而
生乎悔吝利害又以遠近情偽之情遷矣要之凡易
之情固貴近而相得或遠而不相得亦無害也惟近
而不相得則以惡相攻所以致凶也以偽相感所以

致害也且以不善相取所以致悔吝也夫悔吝利害皆吉凶之屬各推其情如此故曰吉凶以情遷可見聖人作易以成能而衆人必由卜筮以知吉凶者此也夫所謂情遷者豈特卦爻之辭為然即凡人之辭亦可見矣理在人心本自難昧如叛正理者其心多愧而辭慚惡理有可否豈宜遷就如疑正理者其心多惑而辭枝離有德之吉人養深蓄邃言不妄發而辭寡無德之躁人輕浮淺露言不由衷而辭多謗善

為惡者毀譽失當其辭浮游而不實失所執守者神
氣沮喪其辭屈抑而不伸凡此皆人之辭以情遷者
也由人之辭以推卦爻之辭則險阻自無遜情此聖
人所以成能百姓所以與能者其為知險知阻一而
已矣按洪範惟皇作極凡厥庶民不罹於咎其即此
作易教人之義也夫



日講易經解義卷十七



總校官庶吉士臣侍朝

校對官檢討臣龔大萬

膳錄監生臣樊少巨